

Scéim nua i nGaoth Dobhair

Ceist 1 Beidh tú ag féachaint ar ball ar thuairisc faoi scéim nua séarachais atá beartaithe le fada do Ghaoth Dobhair. Cad atá ar eolas agat faoin scéal seo? Pléigh na tuairimí atá agat leis an duine in aice leat. Mura bhfuil sibh cinnte tugairí buille faoi thuairim.

Ceist 2 Cén Ghaeilge atá ar na focail agus frásaí seo thíos? Beidh siad le cloisteáil sa mhír ar ball.

- a complete reassessment
- funding
- infrastructural proposal
- hydroelectric station
- the delay
- Department of the Environment
- scattered
- Member of Parliament
- period of a few weeks

Féach ar an mír den chéad uair le feiceáil an raibh an ceart agat.

Ceist 3 Anois, féach ar an tuairisc arís agus freagair na ceistanna seo.

- i. Déan plé leis an duine in aice leat faoin méid a bhí le rá ag na daoine seo a leanas:

An Teachta Dála, Dinny McGinley
An Teachta Dála, Pearse Doherty

- ii. Cén fáth ar luadh Phil Hogan agus Matt Carthy sa mhír?

Ceist 4 Cén chanúint atá ag na cainteoirí ar fad? Cén fáth a ndeir tú amhlaidh? An dtuigeann tú canúint amháin níos fearr ná na cinn eile sa Ghaeilge? Cad í agus cén fáth a dtuigeann tú níos fearr an chanúint sin?

Ceist 5 ‘...níos lú...’

Breischéim na haidiachta ‘beag’ atá i gceist leis an sampla thuas. Is aidiacht neamhrialta é. Cad faoi na cinn seo anois?

beag	níos lú	is lú
mór	_____	_____
álainn	_____	_____
dian	_____	_____
fada	_____	_____
maith	_____	_____
olc	_____	_____
ramhar	_____	_____

te _____

Ceist 6 ‘...d’admhaigh sé...’

Féach ar na habairtí seo agus breac síos na rialacha a bhaineann leis an aimsir chaite (briathra rialta).

Ar chuir tú na litreacha sa phost?

Chair.

Níor chuir.

Ar ól tú *Football Special* riamh?

D’ól.

Níor ól.

Déan cur síos ar an lá a bhí agat inné, ag úsáid na mbriathra seo thíos. Bí cúramach! Is briathra neamhrialta ceithre cinn díobh.

éirigh

ith

téigh

faigh

déan

Ceist 7 ‘...cruinniú..’

Féach ar na leaganacha difriúla den ainmfhocal ‘cruinniú’. Lean an patrún céanna chun na bearnaí a líonadh. Ná déan dearmad den riail ‘leathan le leathan agus caol le caol’.

an cruinniú

ionad an chruinnithe

na cruinnithe

tábhacht na gcruinnithe

an fáiltiú

cuireadh _____

na _____

gloiní na _____

an scrúdú

faid _____

na _____

tábhacht _____

an socrú

am _____

na _____

dátaí _____

Treoracha agus Freagraí

Ceist 1

Is féidir gach beirt a chur ag plé na ceiste seo sula seinntear an tuairisc nó iad a chur ag obair i ngrúpaí de thriúr nó de cheathrar.

Ceist 2

Is féidir an stór focal seo a phlé tar éis féachaint amháin.

a complete reassessment – *athbhreithniú iomlán*

funding – *maoiniú*

infrastructural proposal – *togra infreastruchtúir*

hydroelectric power station – *stáisiún hidrileictreach (hidrileictreachais a bhí sa mhír)*

the delay – *an mhoill*

Department of the Environment – *An Roinn Comhshaoil*

scattered – *scaipthe*

Member of Parliament – *Feisire*

period of a few weeks – *tréimhse cúpla seachtain*

Ceist 3

Féach an script.

Ceist 4

Canúint Uladh atá ag na cainteoirí ar fad seachas Eimear Ní Chonaola. Seo cuid de na focail agus de na frásaí a bhí sa mhír a chuireann canúint Uladh in iúl:

- ag an chruinniú (is é sin, séimhiú seachas urú sa tuiséal tabharthach)
- go fóill
- seo a chuaigh thart
- fosta
- iontach scaipthe
- a thoiseacht
- tchíonn muid
- fán scéim

Ceist 5

beag	níos lú	is lú
mór	níos mó	is mó
álainn	níos áille	is áille
dian	níos déine	is déine
fada	níos faide	is faide
maith	níos fearr	is fearr
olc	níos measa	is measa
ramhar	níos raimhre	is raimhre
te	níos teo	is teo

Ceist 6

Séimhítear fréamh an bhriathair, dar tús consan, chun an aimsir chaite a chumadh:
Chair mé an litir sa phost. / **C**heannaigh sé an iris ar maidin. / **T**hosaigh an rang in am.

Cuirtear **d'** roimh bhriathra a thosaíonn le guta: **D'**ordaigh muid na leabhair. / **D'**ól sibh an tae.

Cuirtear **d'** roimh bhriathra a thosaíonn le **f** agus séimhítear an **f**: **D'fh**oghlaim mé é sin ar scoil. / **D'fh**reastail mé ar na ranganna.

Ar an mhír cheisteach agus **níor** an mhír dhiúltach a úsáidtear roimh bhriathra rialta san aimsir chaite. Pléifear na briathra neamhrialta ar fad san aimsir chaite amach anseo.

D'éirigh mé...; Níor éirigh mé...; Ar éirigh tú...?
D'ith mé...; Níor ith mé...; Ar ith tú...?
Chuaigh mé...; Ní dheachaigh mé...; An ndeachaigh tú...?
Fuair mé...; Ní bhfuair mé...; An bhfuair tú...?
Rinne mé...; Ní dhearna mé...; An ndearna tú...?

Ceist 7

an fáiltiú
cuireadh *an fháiltithe*
na *fáiltithe*
gloíní na *bhfáiltithe*

an scrúdú
faid *an scrúdaithe*
na *scrúduithe*
tábhacht *na scrúduithe*

an socrú
am *an tsocraithe*
na *socruithe*
dátaí *na socruithe*

Eimear Ní Chonaola

Thug an Teachta Dála, Dinny McGinley, le fios go bhfuil Uisce Éireann anois ag iarraidh athbhreithniú iomlán a dhéanamh ar an scéim séarachais a bhí ceadaithe do Ghaoth Dobhair i gContae Dhún na nGall. D'fhógair an rialtas maoiniú don scéim dhá bhliain ó shin ach níl tús curtha fós leis an obair.

Ailbhe Ó Monacháin

I mí na Samhna 2013 d'fhógair an tIar-Aire Comhshaoil, Phil Hogan, i nGaoth Dobhair go gcuirfí €13 milliún ar fáil do scéim séarachais sa cheantar. Tá caint ar an scéim seo le níos mó ná daichead bliain. Ag an chruinniú sin i nGaoth Dobhair, dhá bhliain ó shin, d'admhaigh Phil Hogan go raibh caint ar an scéim séarachais do Ghaoth Dobhair le blianta fada. D'admhaigh sé go mbeadh an togra ar an togra infreastruchtúir is mó sa pharóiste ó tógadh an stáisiún hidrileictreachais anseo i 1954. Dhá bhliain níos déanaí mar sin féin, níl oiread is píopa amháin féin leagtha do scéim séarachais Ghaoth Dobhair go fóill. Tá an mhoill curtha ar an scéim ag bunú Uisce Éireann, atá ag iarraidh athbhreithniú a dhéanamh ar scéimeanna séarachais agus uisce.

Dinny McGinley, TD

Bhí cruinniú agam féin leo Déardaoin seo a chuaigh thart fosta, i mBaile Átha Cliath, agus deir siadsan nach bhfuil siad sásta ar chor ar bith leis an scéim a bhí ullmhaithe ag an Roinn Comhshaoil agus an scéim a d'fhógair Phil Hogan. Síleann siad go bhfuil sé iontach scaipthe, agus paróiste iontach scaipthe í¹ seo, agus deir siadsan gurb é an deacracht atá acu ná gur chóir go mbeadh, in áit scéim mhór amháin ó cheann amháin den pharóiste go dtí an ceann eile, go mbeadh cúpla scéim níos lú ann.

Ailbhe Ó Monacháin

Ach tá brú breise ar an rialtas anois ó tharla go bhfuil Coimisiún na hEorpa² le próiseas a thioseacht³ ina n-éadan, fán⁴ mhoill atá ar an scéim séarachais. Tá fáilte curtha ag Sinn Féin roimhe seo, ós rud é gurb é a Fheisire Eorpach siúd, Matt Carthy, a thug tuairisc don Choimisiún ar an mhoill.

Pearse Doherty, TD

Is é an rud anois atá tugtha le fios ón Choimisinéir chuig Sinn Féin ná go bhfuil siad anois...gur chuir siad ar an eolas an stát go raibh siad á dhéanamh seo, go bhfuil cás anois á thabhairt in éadan an stáit mura bhfuil an stát ábalta a dheimhniú go rachaidh an scéim séarachais ar aghaidh. An tábhacht atá ag baint leis seo ná tchíonn muid áiteanna eile a tharla seo gur chuir sin brú ar na húdaráis chuí...

Ailbhe Ó Monacháin

Tá tréimhse cúpla seachtain ag an rialtas le freagra a thabhairt don Choimisiún ar an mhéid atá beartaithe acu a dhéanamh fán scéim.

Ailbhe Ó Monacháin, Nuacht TG4, i nGaoth Dobhair i gContae Dhún na nGall.

¹ Is ainmfhocal baininsneach é *paróiste* i gcanúint Uladh

² An *Coimisiún Eorpach* an teideal oifigiúil

³ *tosú* an leagan caighdeánach

⁴ *faoin* an leagan caighdeánach